

FCCA ta introduci 20 vivienda pa nos grandinan na Paradera



ORANJESTAD – Mañan, diahuebs 14 di Maart venidero Fundacion Cas pa Comunidad Arubano FCCA lo celebra conhuntamente cu e contratista y invitadonan finalisacion di un otro hoya di proyecto di vivienda den e distrito di Paradera. Pa ta exacto un proyecto di 20 cas specialmente diseña y destina pa nos hende Grandinan, 60 plus. Un proyecto cu ta encera casnan cu un acabado di nivel halto y un infraestructura completo. E idea tras di e proyecto aki a inicia algun aña anterior basa

riba e informacion di peticion y necesidad di nos hende grandinan pa un vivienda mas chikito. Esaki a inspira FCCA pa uza un pida tereno propiedad di e fundacion cu ta keda patras di e cas di cuidu pa nos grandinan na Paradera, esta Stichting Thuiszorg Aruba, pa construi un compleho asina.

E construccion di e vivierendanan tabata na encargo di e contratista Bellagio N.V. cu a haci un bunita trabou y e parti di e infraestructura tabata bou di encargo di Arubaanse We-

genbouw Maatschappij. Cu e proyecto aki FCCA ta pone 20 cas mas riba mercado

y e biaha aki pa un otro grupo di ciudadano, cual ta nos 60 plussersnan.

FCCA kier haci uzo di e oportunidad aki pa invita e pueblo di Aruba pa bin celebra cu nos e logro aki y admira e hoya di proyecto di vivienda aki. Riba e combinacion di foto por tira un bista di e 20 vivierendanan specialmente diseña y destina pa nos grandinan riba 60 aña introduci pa FCCA. □

Oportunidad Unico pa abo siña hunga Wii, X-Box , DS, triominios gratis diasabra awo

ORANJESTAD - “Aruba Doet” conhuntamente cu Oranje fonds, ta prome biaha na Aruba y ta duna colaboracion na Fundacion “Edad no ta conta” pa organisa un evento caminda grandi y hoben lo bini hunto. Pa medio di weganan di mesa y weganan di computer lo pasa e conocimiento di uno pa otro.

Weganan manera domino, triominios, Rumni-Q, Mens Erger Je Niet, Dam, Ahedrez, diferente weganan di carta, Scrabble, Honolulu. Tambe weganan di Computer, manera Wii, DS, Nintendo, X-BOX, Game Cube.

E hende grandinan lo siña e hobennan diferente wega, y alabes e hobennan lo siña e

grandinan weganan di tecnologia moderno.

Meta di e actividad aki, ta pa haci un integracion entre e diferente generacionnan.

Cu esaki, e Fundacion kier demostra e pueblo di Aruba, cu e nomber “Edad No ta Conta” ta bolbe biba den nos actividad, cu lo tuma luga diasabra awor 16 maart 2013, di 10:00 am pa 4:00 pm. Bubali 121, dilanti Club di Movimiento.

Pa participa ta gratis, pero nos lo aprecia pa sa si bo persona ta desea pa participa e dia aki. Forma bo grupo, sea famia, amistad y amigonan, hoben y hende grandi y yama nos libremente na 5936035/5610227

“Nos ta wardabo, pa haci e dia aki, grandi y inolvidabel.” □

INVITACION

Entrega di 20 cas pa nos grandinan na Paradera

Lugar: Patras di cas di cuidu (Stichting Thuiszorg Aruba) na Paradera # 89

Fecha: 14 di maart 2013 - Orario: 4 - 7'or